

Na conferencia di Caribbean Studies Association

PUEBLO MESTER TIN ULTIMO PALABRA

DEN ESCOGE SU PROPIO DESTINO

ORANJESTAD (APA)

For di dia 23 pa 25 di mei ultimo a ser teni e di XV Conferencia Anual di Caribbean Studies Association (CSA). E organisacion aki ta un aglomeracion di tur institucionan academico y expertonan cu tin como nan punto di specialisacion e area di Caribe.

Durante e di XV Conferencia Anual aki a resalta e panel cu a trata e punto di estructura estatal di paisnan no-independiente den area di Caribe. Na e mesa di panel a participa expertonan di e islanan frances (Guadelupe, Martinique), mericano (U.S. Virgin Islands, Puerto Rico), ingles (Turks & Caicos, Anguilla, British Virgin Islands, Cayman Islands, Montserrat)

y hulandes (Aruba).

E panel a pone atencion na e debate actual riba e islanan aki encuanto di e aspecto historico di e cuestion di estructura estatal, e diferente opcionnan politico disponible. Ademas hopi enfasis a wordu poni riba e necesidad di organisacion di referendum p'asina duna e oportunidad pa e pueblonan por escoge den tur libertad.

Tico Croes di partido AVP a wordu invita como experto internacional pa e panel pa no solamente duna un vista di e actual debate aki na Aruba tocante e futuro relacion cu Hulanda, pero tambe como comentarista di e ponencianan di varios panelista.

Den su intervencion Tico Croes a elabora ampliamente riba e cambionan cu a tuma lugar den e ultimo decada den e sistema internacional y nan consecuencia nan pa e viabilidad di paisnan chikito. Mará na e aspecto di viabilidad aki a resurgi conceptonan manera estabilidad y seguridad cu a bira transcendental pa e sobrevivencia di e paisnan chikito.

Akinan Tico Croes a duna ehempel na e cambio drastico di Inglaterra durante 1987 tocante e politica di decolonisacion.

E cambio aki ta cuadra mas tambe cu e esencia di e derecho di autodeterminacion di pueblonan, esta cu ta e pueblo en cuestion mester scoge si e kier pa keda pa keda mantene lazonan estatal cu e pais madre. E consehero di gobierno Britanico na e panel a confirma e ponencia aki.

Segun Tico Croes tur e discusion tocante e asunto di estructura estatal mester focus riba e meta primordial di tur grupo humano cu ta

calidad di bida. Esaki por wordu midi pa e oportunidadnan politico (democracia, derechonan humano) y economico (trabao, posibilidadnan pa sigi progresa, etc). E experiencia cu e paisnan independiente den Caribe a demostra ta, cu considerando independencia como un meta riba su mes tabata un punto di salida equiboca.

Ademas independencia no por a sostene e aspiracionnan y necesidadnan di e poblacion di e paisnan independiente. Den su discurso elocuente, prof. Selwyn Ryan di U.W.I. a elabora entorno di e tareanan nobo di e estado Caribense cu ta basicamente igual cu prome cu e partido cu e paisnan aki a bira independiente.

Finalmente Tico Croes a elabora riba e discusion andando aki na Aruba, esta e posicion di partido AVP, pa mantene status aparte y MEP pa bira independiente. Tico Croes a trese padilanti e pensamentonan hancra den e dos notanan di AVP, esta "Doño di nos propio destino" y "Het Statuut: Vrijheid en

Zekerheid".

Den e contexto aki tambe ela profunda riba e cambio di politica hulandes cu a keda confirma den e plan Hirsch Ballin, cual punto di salida ta remarcablemente similar na idea Eggar, minister ingles pa asuntunan di decolonisacion, cu a bisa, "we would not urge them to consider moving to independence, but we remain ready to respond positively when this is the clearly and constitutionally expressed wish of the people".

Mas di 200 experto di henter mundo riba e area di Caribe a atende e conferencia aki. Tico Croes como experto internacional. Mito Croes como experto estatal awor aki ta trahando riba un buki encuanto checamento di e derecho di autodeterminacion cu referencia na paisnan chikito y en especial Aruba.

E buki aki pronto lo wordu publica na Merca. E hecho cu Tico Croes a wordu invita pa e conferencia aki, ta demostra e reconocimiento cu e tin internacionalmente. Aruba tin derecho di ta orguyoso di dje.